



Prest vai liber – cun il sport da stad

Velo da citad, ballape, chautschas da bogn, raket, inline-skates – la rauba è pronta per la stagiun da stad. En sasez avess ins gia pudì utilizar questas chaussas la primavaira, ma quai na signifitgescha nagut per mes text. Per exequir in sport da stad basta era puma da cros sco tschareschas.

Ridicul ed absurd èsi en mintga cas, sch'ins pensa al spidar lamezis da tscharescha. En sasez funcziunass quest sport era cun cros da persics e da nectarinas ubain schizunt cun quels dad ivas. La suletta premissa per l'invenziun d'in nov sport da stad è in spiert innovativ. Ins pudess montar rodas vi da scadin urdain dal sport d'enviern. Empè dals patins existan dentant gia ils inline-skates e per ir cun aissa la stad datti il «mountainboard». Enstagl d'ir cun scarsola charresch'ins cun il minicar da las spundas giu. I na dat nagut ch'i na dat betg, ma da nagut na vegn nagut. Il tir al lung da telefonins è dentant la culminaziun. En quest gieu ston ins sulettamain dumagnar ina regla, numnadamain quella da la pli lunga distanza. Pretensiusa n'è la regla betg, però fitg significativa. Jau fiss da l'avis ch'ins stuess introducir quest sport sco sport da mintga stagiun e far el obligatoric per tut ils possessurs da natels. En pauc temp avessan era personas passivas in'actividad che faschess effect. Senza telefonin stuessan els reflectar tge far cun lur temp, e la soluziun fiss – far sport, saja quai sport da stad, da primavaira, d'atun u d'enviern. La fiera prosperass ed il mund fiss puspè en urden. Il sport da stad cun il tir al lung da telefonins po entschaiver. Pli gugent oz che damaun... Viva il sport!

Sibylle Pfiffner